

সাত কলেজের শিক্ষার্থীদের স্বস্তি দিন আর কে চৌধুরী

ঢাকা বিশ্ববিদ্যালয় অধিভুক্ত রাজধানীর সাত কলেজের শিক্ষার্থীরা অনার্স চতুর্থ বর্ষের ফল প্রকাশের দাবিতে রোববার রাজপথে নেমেছিলেন। যানজটের নগরীতে শিক্ষার্থীদের রাজপথে অবস্থান প্রায় পুরো রাজধানীকে অচল করে ফেলেছিল। জাতীয় বিশ্ববিদ্যালয়ের এই সাত কলেজ ঢাকা বিশ্ববিদ্যালয়ের অধিভুক্ত হওয়ার পর শুরু হয় সংকট। পরীক্ষার সময়সূচি ঘোষণার দাবিতে গত জুলাইয়ে শিক্ষার্থীরা রাজপথে নামতে বাধ্য হয়। সে সময় পুলিশের ছোড়া টিয়ার গ্যাসের শেলে চৌধুরী শাহান তিতুমীর কলেজের শিক্ষার্থী সিদ্দিকুর রহমান। রোববার শিক্ষার্থীরা যে দাবিতে বিক্ষোভ করেছেন তা যে যৌক্তিক এতে সন্দেহ নেই। জাতীয় বিশ্ববিদ্যালয়ের চতুর্থ বর্ষের ফল প্রকাশ পেয়েছে মে মাসে। কিন্তু সাত কলেজের শিক্ষার্থীরা ফল প্রকাশ না হওয়ায় স্নাতকোত্তর শ্রেণিতে ভর্তি হতে পারছেন না।

এ বছর ঢাকা কলেজ, ইডেন কলেজ, শহীদ সোহরাওয়ার্দী কলেজ, কবি নজরুল কলেজ, বেগম বদরুন্নেসা কলেজ, মিরপুর বাঙলা কলেজ ও তিতুমীর কলেজকে ঢাকা বিশ্ববিদ্যালয়ের অধিভুক্ত করার সিদ্ধান্তকে স্বাগত জানিয়েছিলেন শিক্ষার্থী ও অভিভাবকরা। কিন্তু দুই বিশ্ববিদ্যালয়ের দ্বন্দ্বের কারণে এ সিদ্ধান্তের সুফল থেকে বঞ্চিত হচ্ছেন শিক্ষার্থীরা। অভিযোগ উঠেছে, দেশের সাত গুরুত্বপূর্ণ কলেজ নিজেদের হাতছাড়া হয়ে যাওয়ার ক্ষেত্রে জাতীয় বিশ্ববিদ্যালয় কর্তৃপক্ষ ঢাকা বিশ্ববিদ্যালয়কে প্রয়োজনীয় তথ্য দিতে অসহযোগিতা করায় সংকটের শুরু। অন্যদিকে প্রায় ২ লাখ কলেজ শিক্ষার্থীর ব্যবস্থাপনার জন্য যে লোকবল দরকার তা এ মুহুর্তে না থাকায়ও জটিলতা সৃষ্টি হয়েছে।

জাতীয় বিশ্ববিদ্যালয়ের সাতটি কলেজ ঢাকা বিশ্ববিদ্যালয়ের অধিভুক্ত হওয়ার পর এখন বিপাকে পড়েছেন এসব কলেজের শিক্ষার্থীরা। লিখিত পরীক্ষা শেষ



হওয়ার পর ৮ মাস পর হলেও এসব ছাত্রছাত্রী পরীক্ষার ফল পাননি। কবে এই ফল প্রকাশ করা হবে তাও জানানো হয়নি বিশ্ববিদ্যালয়ের পক্ষ থেকে। বিসিএসসহ বিভিন্ন সরকারি চাকরিতেও তারা

আবেদন করতে পারছেন না। ফল প্রকাশসহ বিভিন্ন দাবি আদায়ে শিক্ষার্থীরা একের পর এক কর্মসূচি পালন করলেও সমাধান মিলছে না। তবে একটি সূত্র জানিয়েছে, এই শিক্ষার্থীদের আপাতত অ্যাপিয়ার্ড সনদ দেয়া হবে। সহসাই মূল সনদ মিলছে না তাদের। অধিভুক্ত সাত কলেজের ২০১১-১২ সেশনের স্নাতক সম্মান চতুর্থ বর্ষের পরীক্ষা ৮ মাস আগে ১১ ফেব্রুয়ারি শেষ হলেও এখনও ফল প্রকাশ হয়নি। অধিভুক্ত হওয়ার পর মৌখিক পরীক্ষা শেষ হয় গত জুনে। অথচ জাতীয় বিশ্ববিদ্যালয় এই পরীক্ষার ফল প্রকাশ করেছে গত ১৪ মে। জাতীয় বিশ্ববিদ্যালয়ে প্রথম বর্ষে ভর্তিতে আবেদন প্রক্রিয়া শেষ হলেও ঢাবি অধিভুক্ত সাত কলেজে কবে এই ভর্তি প্রক্রিয়া চালু করা হবে সে ব্যাপারেও দেয়া হয়নি কোনো নির্দেশনা। জাতীয় বিশ্ববিদ্যালয়ে পরীক্ষা ছাড়াই শিক্ষার্থী ভর্তি করা হয়। কিন্তু ইতিমধ্যে ঢাকা বিশ্ববিদ্যালয় প্রশাসন শিক্ষার্থী ভর্তির ক্ষেত্রে ভর্তি পরীক্ষা নেয়ার সিদ্ধান্তের কথা জানিয়েছে। কিন্তু কোন পদ্ধতিতে ভর্তি পরীক্ষা নেয়া হবে সে ব্যাপারে কোনো নির্দেশনা না থাকায় বিপাকে পড়েছেন ভর্তিছুরা।

ঢাকা বিশ্ববিদ্যালয়ের সাবেক উপাচার্যের সঙ্গে জাতীয় বিশ্ববিদ্যালয় উপাচার্যের ব্যক্তিগত সুসম্পর্কের খাতিরে থাকায় সমস্যার জট খোলেনি গত আট মাসেও। তবে ঢাকা বিশ্ববিদ্যালয়ে নতুন উপাচার্য দায়িত্ব নেয়ায় অচিরেই বরফ গলবে বলে আশা করা হচ্ছে। সাত কলেজের শিক্ষার্থীদের এ ব্যাপারে আশ্বস্ত করেছেন ঢাকা বিশ্ববিদ্যালয় উপাচার্য। আমরা আশা করব, এই শিক্ষার্থীদের সমস্যার দিকে দুই বিশ্ববিদ্যালয় কর্তৃপক্ষ নজর দেবে। এটি তাদের কর্তব্য বলে বিবেচিত হওয়া উচিত।

আর কে চৌধুরী : সাবেক চেয়ারম্যান, রাজউক; মুক্তিযুদ্ধে ২ ও ৩নং সেক্টরের রাজনৈতিক উপদেষ্টা